

4 Vokabulario

Un sorpresa pa Timo

Porfin e dia a yega. Tempran Timo a biaha di Aruba pa Kòrsou. Timo ta loko pa topa su prima Marla di Kòrsou atrobe. Ora e yega Kòrsou, ya Marla, su amiga Sheila di Boneiru, tio Eddy i tanchi Martha ta para ward'é. 'Bon biní, bo avion ta na tempu!' tio ta bisa. Marla ta brasa Timo i ta bis'é: 'Kon ta primu? Bo a haña un brel nobo! Nèchi!' Timo ta kumindá ku smak i nan ta dreতা outo. 'Mí tin un sorpresa pa bo,' tanchi Martha ta bisa na kaminda. 'Nos no ta bai kas mesora. Promé nos ta bai Museo Marítimo di Kòrsou. Den Museo Marítimo bo por mira diferente opheto ku ta relashoná ku laman. Ya ku abo gusta tur kos ku tin keber ku laman, Timo, nos a pensa ku un bishita na e museo akí lo kai na smak.' 'Sigur ku sí, tanchi,' Timo ta bisa entusiasamá. Ora nan yega, e muchanan no tin basta wowo pa wak. E museo ta situá den un manshon bunita di tres piso na Skarlo. E interior, esta e parti paden di e edifisio, parse un bapor grandi. Tin guènguwe, bentana di kamarote i baranda. 'Laga nos kuminsá na e parti di e indjannan arowak. Nan tabata e promé hendenan ku a yega nos isla,' tio ta bisa. 'Den kanoa, ku nan mes a traha di tronkon di palu, nan a krusa laman. Un kanoa asina e indjannan tabata yama un kuliala.' 'E, e, e indjannan ei sí tabatin kurashi!'

Timo ta bisa ku admirashon, miéntras e ta studia e plachi di e kuliala. Nan ta sigui kana. E muchanan ta mira e parti di e eksploradónan spañó ku a yega Kòrsou despues. Por último tio ta konta i nan ta mira kon e nabegantenan hulandes a yega aki. Den e museo e muchanan ta mira aparato di nabegashon i tur sorto di mapa noutiko, esta mapa ku ta usa pa yuda den nabegashon. Tambe nan ta mira miniatura di diferente sorto di barku, esta modelo chikí di barku. Pa nan sorpresa no tin solamente barku di ántes, pero tambe barku mas moderno ku por karga kòntainer. Nan ta admirá e maketa di Shell, un modelo chikí di e refineria di ántes. Tio ta konta kon tankero grandi ta bin trese petroli. For di e petroli akí ta traha diferente produkto manera gasolin, kerozin i zeta di motor. Timo ta para soña na e maketa. E tin gana di bira kapitan di un tankero grandi asina. Di ripiente Marla i Sheila ta ranka su man. 'Ban, Timo,' nan ta bisa, 'nos tur a sigui kana i abo so ta pará aki ainda!' Timo ta kana bai tras di Marla i Sheila. E ta pensa: Aweró lo mi konta kiko mi ke bira dia mi bira grandi. I ku un sonrisa riba su kara e ta sigui skucha e splikashon interesante di tio.


- bentana di kamarote
- guènguwe
- interior




Museo Marítimo di Kòrsou ta situá den un ... di tres piso na Skarlo.



E ... di e museo parse un bapor grandi.




Via di un ... bo ta subi òf baha for di un barku. E bentananan di un barku nos ta yama ...



Na bordo ta usa ... pa yuda den nabegashon.



Den e museo bo ta mira ... di diferente barku.



E ... di Shell ta un modelo chikí di e refineria di ántes.

Tarea 1
Kiko bo ta yena?
• Lesa e frase bou di kada pintura.
• Buska e palabra ku falta, den e rei aki bou.
• Skibi e palabra den bo skref.

E bentananan di un kamarote ta bentana spesial. Kiko ta e diferensianan entre un bentana komun i un bentana di kamarote?

Tarea 2
Bo sa e kontesta?
• Un kamer riba un barku òf bapor nos ta yama un kamarote.

Tarea 3
• Den un museo bo por hasi uso di un guia tambe. Abo lo ke ta guia di un museo marítimo? Splika bo kontesta.

- maketa
- manshon
- mapa noutiko
- miniatura